

EVANS, WILLIAM HUGH ('Gwylt y Mynydd'; 1831-1909), gweinidog gyda'r Wesleaid, a llenor

Enw: William Hugh Evans

Ffugenw: Gwylt Y Mynydd

Dyddiad geni: 1831

Dyddiad marw: 1909

Plentyn: William Owen Evans

Rhiant: John Evans

Rhyw: Gwryw

Galwedigaeth: gweinidog gyda'r Wesleaid, a llenor

Maes gweithgaredd: Crefydd; Llenyddiaeth ac Ysgrifennu; Ysgolheictod ac Ieithoedd

Awduron: Edward Tegla Davies, Robert Thomas Jenkins

Mab i '[Ioan Tachwedd](#)' (John Evans, 1790 - 1856), a brawd i '[Cynfaen](#)' (John Hugh Evans). Ganwyd ef yn y Maenllwyd Mawr, Ysgeifiog, 13 Ionawr 1831; gadawodd yr ysgol yn fore am na fynnai ei dad iddo ddysgu catecism yr Eglwys Sefydledig. Dechreuodd bregethu yn 1850, derbyniwyd i'r weinidogaeth yn 1855, a galwyd i waith cylchdaith Caergybi yn 1856. Gwasnaethodd gylchdeithiau Caernarfon, Abergele, Biwmares, Llanfair Caereinion, Dinbych (a'r Rhyl), Llangollen, Dolgellau, yr Wyddgrug, Llanrwst, Porthmadog, Abermaw, Lerpwl (Shaw Street), Bagillt, a'r Rhyl - yno yr ymneilltuodd (1895). Cododd achos newydd yn Nolwyddelan, a chapelau newydd ym Mhorth-y-Gest a'r Rhyl (Soar). Gadawodd bob un o'i gylchdeithiau â chynnydd yn ei haelodau. Bu'n foddion i sefydlu cynghorau Wesleidd, gan rannu'r dalaith yn adrannau; a sefydlodd gynadleddau ysgolion Sul. Yr oedd yn wleidydd eiddgar - mewn cyfnod pan wgai ei enwad ar hynny; bu ganddo ran amlwg yn sefydlu'r Ysgol Fwrdd yn Llangollen (1870), a chondemniai'r rhyfel â'r Boëriaid. Yr oedd hefyd yn sgrifennwr diwyd. Cyfrannodd i'r *Eurgrawn* am 60 mlynedd, ac i'r *Winllan* (a olygodd o 1864 hyd 1867) am 57 mlynedd; yr oedd yn un o gychwynwyr *Y Gwylledydd* (1877), ac yn ddiweddarach bu'n olygydd iddo am 13 mlynedd (yn y Rhyl). Cyfrannodd hefyd i'r *Traethodydd*, *Y Geninen*, a'r *Athrnydd*. Cyhoeddodd amryw esboniadau a holwyddoregau, a chasglodd emyniadur i'r ysgolion Sul. Yn 1888 cyhoeddodd gofiant i'w frawd '[Cynfaen](#)'. Bu farw 28 Mehefin 1909.

Mab iddo oedd WILLIAM OWEN EVANS (1864 - 1936), yntau'n weinidog a llenor; ganwyd yn Llanfair Caereinion yn 1864; bu mewn ysgol yn Leeds yn ysgol ramadeg Llanrwst, ac yng ngholeg Didsbury. Dechreuodd weinidogaethu yn 1887. Bu'n llywydd y gymanfa Gymreig yn 1914, ac yn gadeirydd ail dalaith y Gogledd, 1924-33; yn 1930 etholwyd ef yn un o 'Gant Cyfreithiol' ei enwad. Ymneilltuodd yn y flwyddyn honno i Brestatyn, a bu farw yno 16 Gorffennaf 1936; claddwyd yn y Rhyl. Cyfrifid ef yn bregethwr hynod dda, yn y ddwy iaith. Heblaw ei gofiant i'w dad, a llyfr ar [Thomas Coke](#), cyhoeddodd amryw esboniadau. Sgrifennai hefyd yn fynych i'r *Eurgrawn* a chyfnodolion eraill, a bu'n olygydd *Y Winllan* am chwe blynedd. A chyfansoddodd nifer o emynau.

Awduron

Y Parchedig Edward Tegla Davies, (1880 - 1967)

Yr Athro Emeritus Robert Thomas Jenkins, (1881 - 1969)

Ffynonellau

Cofiant gan ei fab yn *Yr Eurgrawn Wesleyaidd* 1910

cofnodion y Gynhadledd Brydeinig, 1909

Dolenni Ychwanegol

Wikidata: [Q20734638](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

